

# АҚМЕШІТ

Жаннан қымбат оларға ар,  
Мен жастарға сенемін.



Мағжан



Газет 2013 жылдың  
қыркүйек айынан бастап шығады

# Жастары

Қызылорда облыстық жастар газеті

№ 3 (540)  
18 қаңтар, 2024 жыл



## ЕРКІНДІК – АДАМНЫҢ ІШКІ ТӘУЕЛСІЗДІГІ

Қазір шарт пен шамаға шектелген жас жоқ. Ынта мен ырыққа сай ірі іс, жетістік жолында төбе көрсетіп жүр. Бойдағы еркіндік те кеңістікте құлаш сермеуге негіз. Жастарға қатысты жайттың бәрі қоғам назарында һәм талқысында. Осы орайда журналист, медиалектор Абай Тағыберген өзіндік ой-пікірімен бөліскен еді.

– «Жастар – жалқау» деген ой көп айтылатын. Ал қазіргі қарқын-қозғалысқа қарап, бұлай деу қате секілді. Қалай ойлайсыз, қасаң қағидадан қаншалықты арылдық?

– Жастар жалқау деген пікір ғана. Қазіргі буын барынша тиктоникалық өзгерістерге дайын, соған сай қарым-қабілетке ие болуы керек. Екпіні ерек, қарқыны қатты, өзгермелі трансформация кезеңі қай салада болсын бәсекеңі күшейтті. Айналага қарасаң жер шұқып, бос қарап жүрген жас жоқ. Әрине, енжарлық танытып, сүлесөк болып, өз бағытын таппай, адасып жүрген жастар да бар шығар. Бірақ өз күшімен, ерік-жігерімен әлемдік компанияларға жұмыс істеуге шақырту алып, мемлекеттік қызметтің жоғары сатысынан көрініп, бизнес жүргізуде көшбасшы болып, ауылдың тамырына қан жүгіртіп, ата кәсіпті лайықты жалғастырып отырған, өнер мен спортта қолтаңба қалдырып, IT салада жаналық ашып жүрген жастар жетерлік. Ең бастысы, өзін жалқаулықтан жеңе білген әрбір азамат табысқа жете алады. Сондықтан «жастар – жалқау» деген көзқарастан арылатын уақыт келді.

Жалғасы 4-бетте

## ЖҰМЫССЫЗ ЖАСТАР: ДАМУДЫ ТЕЖЕЙТІН ТҮЙТКІЛ



Қызылорда облысында 2023 жылы жастар арасында 616 қылмыс тіркелген. Оған 699 жас пен жасөспірім қатысқан екен. Олардың ішінде 23 мектеп оқушысы, 47 студент, 68 әртүрлі мекемеде жұмыс істейтін жастар бар. Қалған 561-і немесе 80,2 пайызы – жұмыссыз, еш жерде оқымайтындар. Сандар осылай сайрап тұр. Байқасаңыз, жұмыссыздар қылмыс пен бұзақылыққа бейім келеді. Ел дамуын тежейтін түйткілдің бірі осы – жастардың жұмыссыздығы.

Мемлекет тарапынан жастарды жұмыспен қамтуға арналған бірнеше бағдарлама бар. Алайда жыл өткен сайын NEET жастар саны көбеймесе, азаяр емес. Себебі неде? Жастар құлықсыз ба, әлде мемлекеттік бағдарламалар қауқарсыз ба? Күрмеуі күрделі көп сұраққа жауап іздеп көрдік...

Өткен жылы Қазақстанда Халықаралық еңбек ұйымының әдістемесі бойынша есептелген жұмыссыздық деңгейі 4,8 пайызға жеткен. Ұлттық статистика бюросының мәліметінше, республика экономикасының әртүрлі салаларында 9 млн адам жұмыспен қамтылған. Олардың 6,9 миллионы жалдамалы қызметкер болса, 2,1 млн адам өзін-өзі жұмыспен

қамтығандар. Ал жұмыссыз адамдардың саны – 453,5 мың. 15 пен 34 жастағылар арасындағы жұмыссыздық деңгейі – 4,1 пайыз.

Жұмыс істемейтін және білімнен немесе кәсіптік оқумен айналыспайтын NEET жастарының үлесі – 7,9 пайыз (422 мың адам). Бұл сандар елімізде жұмыссыз жастардың саны өскенін тағы да бір дәлелдеп отыр. Бұған Мәжіліс депутаттарының ұсынысымен жастар санатының 35 жасқа дейін ұзаруы да әсер етеді. Норма бекітілгеннен кейін еліміздегі жастар саны 6,2 миллионға жетті. Демек NEET санатындағы жастар саны азаймай, керісінше көбейіп келеді.

3  
бетте

## ОСМИЙ ТУРАЛЫ ОЙ

ЕҢ ҚЫМБАТ ӘРІ ҚАЗАҚСТАНДА ҒАНА ӨНДІРЕЛІТІН  
МЕТАЛЛ ТУРАЛЫ НЕ БІЛЕМІЗ?

Қазақстандағы түсті металлургия өндірісі мен экспорты туралы дау көп, тұжырым алуан. Алайда бүгінгі тақырып сирек кездесетін құнды металл – осмий туралы болмақ. Себебі аталған металлдың нарықтағы құны алтыннан 300 есе, күмістен 10 мың есе қымбат. Бастысы, Қазақстан бұл металды өндіретін және сататын жалғыз мемлекет. Осы орайда «бұл бағыттағы өндіріс көлемі қанша?», «Құнды өнімнен түсетін қыруар қаржы қайда кетеді?» деген сауалға жауап іздеп көрелік.

Осмий ак түсті, көгілдір реңкке ие. Алтыннан 300 есе қымбат фантастикалық әлемі металл осылай көрінуі керек шығар. Осмий бар сіріңке қорабының салмағы килограмнан асады. Алайда ол радиоактивті емес. Сондықтан аэроғарыш саласында, ракета жасауда, қазіргі заманғы технологиялар мен көптеген дәрілік препаратты синтездеу кезінде пайдаланылады. Таңқаларлығы, табиғатта Осмий-187-ден тығыз зат жоқ. Сондықтан бұл элементті 9 ай бойы өндіреді.

Иә, осмий – еліміз сыртқа шығаратын қымбат металдың қатарында. Табиғатта аталған элемент 7 изотоп түрінде кездескенмен, ішіндегі дәл осмий-187 тек елімізде өндіріледі. Қымбаты да сол. Оған мысал, Қазақстан 2004 жылдан бастап ғана осмий экспорттайды. Оған дейін металдың нарықтағы бағасы грамына 100-200 мың долларды құраған. Ал біздегі экспорт есігі ашылып, өнім әлемге тараған соң баланс теңескен. Қазір осмий-187 изотопының құны грамына 10 мың доллар шамасында.

2  
бетте



### ШЕКТЕУ

ШЕКТЕН  
ШЫҚҚАН ЖОҚ ПА?

2



### «АЛАТАУ СЕРІЛЕРІ»

ҰЛТТЫҚ  
МУЗЫКАДАҒЫ ЖАҢА  
СЕРПІН

8

## ҚОҚЫС САЯСАТЫ: ПОЛИГОННЫҢ ПАЙДАСЫ ҚАНДАЙ?

Қоқыс – құнды шикізат. Жаһанның жасыл экономиканы жүзеге асыруы содан. Қайта өңдеп, қолданыстағы тауарға айналдырып отыр. Тіптіңше, бұл – биосфераның былғанбауына сеп. Ал, бізде тәртіп пен тазалық толық сақталмайды. Қоғамның қоқыстан көз ашпауы экологиялық проблеманы туындатады. Ал тығырықтан шығатын амал қайсы? Қоқысты қаншалықты кәдеге жаратып жүрміз? Осы тақырып төңірегінде сөз қозғалық.

5  
бетте













Жуырда Жасөспірімдер Олимпиадасы басталмақ. Бүгінде байрақты бәсекеде ел туын қай спортшыға тапсырылатыны белгілі болды. Ресми мәліметке сәйкес, 2024 жылғы қысқы Жасөспірімдер Олимпиадасында ұлттық құраманың туын Батыс Қазақстан және Солтүстік Қазақстан облыстарының спортшылары алып шығады деп жоспарланған.



## Жасөспірімдер Олимпиадасы: Қазақстан туын кімдер алып шығады?

Бүгін Оңтүстік Кореяның Канвон қаласында өтетін қысқы Олимпиада ойындарында Қазақстан жастар құрамасының ту ұстаушылары ресми түрде белгілі болды. «Ұлттар шеруі» кезінде Қазақстан туын конькимен жүгіруден Петропавлдан ұлттық құраманың мүшесі Кристина Шумекова мен оралдық шорт-трекші Ерасыл Шыңғысхан алып шығады.


Бұл дарынды спортшылар Қазақстан туын спорттағы жетістіктері үшін ғана емес, халықаралық спорт ареналарында көрсеткен мінезінің мықтылығы үшін де алып жүру құрметіне ие. Он сегіз жастағы Кристина Шумекова – конькимен жүгіруден Қазақстан Республикасының спорт шебері, өз жас санатындағы Қазақстан Республикасының чемпионы, 2023 жылы Италияда өткен Әлем Кубогі кезеңінің күміс жүлдегері. Он жеті жастағы Ерасыл Шыңғысхан шорт-тректен спорт шеберіне кандидат, өз жас категориясы бойынша Қазақстан Республикасының чемпионы, сонымен қатар 2023 жылғы «Азия балалары» халықаралық жарысының күміс жүлдегері.

«Бұл мен үшін керемет қобалжитын сәт. Қысқы Олимпиада ойындарында Қазақстан атынан өнер көрсету – абырой ғана емес, үлкен жауапкершілік. Мұз айдынында бар күшімді саламын деп уәде беремін. Әрқайсымыз Олимпиада жүлдесін алуды армандаймыз және бұл ойындар мақсатқа жетуге мүмкіндік», – деді Кристина Шумекова.

Шорт-тректен Қазақстан ұлттық құрамасының мүшесі Ерасыл Шыңғысхан да өз ойымен бөлісті:

– Мен үшін Канвонда еліміздің ұлттық құрамасының туын алып шығу – үлкен жауапкершілік. Біздің команда алдағы жарыстарға дайын, Қазақстанды лайықты түрде көрсете алатынымызға сенімдімін. Жасөспірімдер Олимпиадасына қатысу – маңызды тәжірибе, кәсіби осуімнің бір бөлігі, – деді ол.

Канвон-2024 миссиясының басшысы Елсияр Қанағатов ұлттық жастар құрамасының ту алып шығатындарды тандауына сенім білдірді.



– Кристина мен Ерасыл – мықты және біртұтас командамыздың жарқын өкілдері. Олардың ынта-жігері мен спортқа берілгендігі Оңтүстік Кореяға баратын жасөспірімдер құрамасының жақсы қасиеттерін көрсетеді. Бұл жастар қазақстандық спорттың жаңа буынының бетбейнесі. Олардың Канвон қаласында өтетін қысқы Жасөспірімдер Олимпиадасында көрсететін өнерін асыға күтеміз және осы ойындарға қатысу спортшыларымызға халықаралық жарыстарда өнер көрсетуде құнды тәжірибе алуға мүмкіндік береді, – деді ол.

Канвон-2024 жасөспірімдер арасындағы IV қысқы Олимпиада ойындары 19 қаңтарда ашылады және 1 ақпанға дейін Пхенчхан 2018 қысқы Олимпиада ойындарын қабылдаған Оңтүстік Кореяның Канвон провинциясында өтеді. Оңтүстік Кореядағы Жасөспірімдер Олимпиада ойындарына әлемнің 50 елінен 1800 спортшы қатысады деп жоспарланған. Жеті спорт түрінен (15 пән) 81 медаль жиынтығы ойнатылады. Қазақстанның спорт делегациясы құрамында спорттың бес түрінен 42 спортшы бар.

Қазақстан жасөспірімдер арасындағы қысқы Олимпиада ойындарына 2012 жылдан бері қатысып келеді. Жалпы, еліміз үш қысқы жасөспірімдер Олимпиада ойындарына қатысып, екі күміс және алты қола медаль жеңіп алды.

### СЕНСАЦИЯ



Жуырда Дубайдағы Мейдан ипподромында өткен Al Maktoum Challenge-нің бірінші кезеңінде қазақстандық Кабирхан атты тұлпар жеңіске жеткен еді. Бәйгеңің әлеуметтік желіде тараған бейнежазбасынан тұлпардың оқ бойы озық шығып, жарыс көрігін қыздырғанын байқауға болады.

Дубайда өткен 2000 метрлік ұшқыр бәйгеде 13 тұлпар бақ сынаған. Бабы мен бағы келіскен қазақ тұлпары кіл жүйріктер арасынан шын жүйрік екенін дәлелдеп, мәрені бірінші қиған. Дубайды дүбірлеткен Кабирхан тұлпардың қазіргі иесі – оралдық Тілек Мұхамбетқалиев.

## ДУБАЙДА ТОП ЖАРҒАН АРҒЫМАҚ

Аталған тұлпарды Қазақстанға 2021 жылы 1,5 жасында Надиір Хасанов деген атбегі Америкадан досына Алматыға әкеліп берген. Оның айтуынша, алғашқы жарысын Алматы ипподромында бастаған жүйрікті Руслан Юлдашев дайындаған. Сол жылы Кабирхан ұшқыр бәйгеде үш ресми старт жасап, жүлдегер атанған. Сөйтіп өз қашықтығында екі жастағы арғымақтар арасында Қазақстанның ең үздік ұшқыры атанған.

Кейін оны бәйге науқаны аяқталған соң оралдық Тілек Мұхамбетқалиев сатып алып, Ресейге алып кетеді. Ресейде Кабирханды Арыстангерей Шавуев есімді жаттықтырушы дайындап, Ресейде екі рет Дербидің үздігі атандырады. Жалпы ол жақта алты старт жасап, оның бесеуінде бірінші болып келген. Соңғы бүкілресейлік бас Дербиде ғана Херомо атты тұлпардан кейін екінші болып келген екен.

– Бұл жеңісті сөзбен айтып жеткізу мүмкін емес. Кабирханның көптеген жанкүйері бар: Қазақстан, Ресей, АҚШ және Еуропа. Бәрі құттықтап жатыр. Мұндай тұлпар жүз жылда бір рет туады. Тұлпарымыз беделді жарыста

қазақ елінің атын шығарып жатыр. Бұл – халықтың жеңісі, – деді тұлпар иесі.

Оның айтуынша, Дубайдағы бәйгеңің бірінші кезеңінде жеңіске жеткені үшін Кабирханға 126 мың дирхам (15 млн 477 мың 202,79 теңге, 1 дирхам – 122,83 теңге) берілген.

– Енді 26 қаңтарда тұлпарымыз бабында болса, ол Al Maktoum Challenge жарысының екінші кезеңіне қатысады. Мұнда асыл тұқымды ағылшын тұлпарлары жарысады. Осы маңызды бәйгеге дайындалып жатырмыз. Оның жүлде қоры – 1 млн доллар (451 млн 160 мың 500 теңге, 1 доллар – 451,16 теңге), – деді Тілек Мұхамбетқалиев.

2023 жылдың қараша айында ат иесі Кабирханды Дубайдағы бәйгелерге сынауға алып барады. Дубайдағы жаттықтырушысы – Дуглас Уотсон. Атбегі бұл бәйге де тұлпар үшін маңызды екенін айтты.

Айтарлығы, 85-105 рейтингіндегі тұлпарларға арналған гандикап бәйгесінде Кабирхан Ресейде қалып қойған Херомодан оза шапты. Өзге қарсыластары да осал емес, олар әр түрлі елдерден келіп, Дубайда бір

жылға жуық дайындықта тұрған. Кабирхан небәрі екі айдай ғана дайындалып шапқан екен.

Енді тұлпардың алдында тағы бір осындай бәйге тұр. Сол жерде үздік атанса Бүкіләлемдік кубок үшін бақ сынады.

Сенсациялық жеңіске «Бәйге» федерациясының атқарушы директоры Алтай Беймен де пікір білдірген. Оның сөзіне, тұлпар көрсеткіші қазақстандық атбегілерге жігер бермек.

– «Al Maktoum Challenge бәйгесінің бірінші кезеңінде жеңімпаз атану – зор қуаныш. Ұшқыр бәйгеде әлемдегі үздік мемлекеттермен текетіресетіндей деңгей көрсете аламыз. Осы жеңіс алғашқы қадамның бірі деп ойлаймын. Себебі, Қазақстанның ат спорты тарихында мұндай жеңіс бірінші рет болып тұр. Халықаралық беделді жарыста Кабирхан атты тұлпар бірінші келіп, қазақтың көк туын желбіретті. Осылайша, Тілек Мұхамбетқалиев мұндай биік мақсат қоюға болатынын көрсетті. Бұл еліміздегі көптеген атбегіге мотивация береді деп сенеміз, – деді басшы.

## ӘЛЕМ ЧЕМПИОНЫ АТАҒЫН ҚОРҒАДЫ

Канадада бокс кеші өтіп, жартылай ауыр салмақтағы WBC, WBO және IBF чемпионы Артур Бетербиев кештің басты кездесуінде Каллум Смитпен жұдырықтасты.



Жетінші раундта Смиттің бұрышы жекпе-жектен жалғастырудан бас тартты.

Осылайша, Бетербиев Дүниежүзілік бокс кенесі, Халықаралық бокс федерациясы және Дүниежүзілік бокс ұйымы бойынша әлем чемпионы атағын қорғап қалды. 38 жастағы Бетербиевтің рекордында енді 20 жеңіс бар. 33 жастағы Смит 29 жеңісінде екінші жеңілісіне ұшырады.

## ПАРАЛИМПИДАҒА ЖОЛДАМА АЛДЫ

Қазақстандық пара таеквондошылар Паралимпиада ойындарының 3 лицензиясына ие болды. Паралимпиада ойындарының квалификациялық регламентіне сәйкес K44 санатында 80 келге дейінгі салмақ дәрежесінде пара таеквондошымыз Нұрлан Домбаев, +80 келі салмақта Нышан Өмірәлі және -57 келі салмақта Кәмиля Досмалова ойындарына жолдамаға қол жеткізді.



Спортшыларымыз әлемдегі рейтингтің көрсеткішіне сәйкес, топ 20 үздік спортшылар қатарына кірді.

Бүгінгі күнге дейін қазақстандық пара спортшылар Париж-2024 Паралимпиада ойындарына 5 лицензияға ие болған: пара жеңіл атлетика, пара пауэрлифтинг, волейболды отырып ойнау, пара каноэ және пара жүзу.

Еске сала кетсек, Токио-2020 Паралимпиада ойындарында Қазақстан ұлттық құрамасы 25 спортшымен таныстырылып, 5 медаль жеңіп алып, 48 жалпы командалық орынға ие болды.

## ТРИАТЛОН: АЛТЫН ЕНШІЛЕДІ

Триатлоннан Қазақстан құрамасы Әл-Хобарда (Сауд Арабиясы) өткен триатлоннан (спринт) Азия чемпионатында екі жүлде алды.



Әйелдер арасындағы бәсекеде Екатерина Шабалина алтыннан алқа тағынды. Екіншісі – қытайлық Синь Линь. Ал Бейли Браун мәреде үшінші болды.

Ерлерде Аян Бейсенбаевқа тең келер ешкім болмады. Джейсон Тай Лонг күміспен аяқтады. Үшінші нәтижені жапондық Кента Учида көрсетті.

